

Sjø- og jordkabel framfor luftspenn

Framføring av elektrisk kraft i samband med oppbygginga av nye arbeidsplassar og anna er naudsynt. No trengst det ein god plan for omfanget av, og måten denne nettutbygginga skjer på.

Statnett skal i åra framover bygga nye 420 kV kraftleidningar over heile landet. Som luftspenn er desse arealkrevjande og øydeleggande for natur-, landbruks og rekreasjonsområde. Dette har me døme på i planlagde linje mellom Blåfalli i Kvinnherad kommune og Gismarvik i Tysvær kommune, gjennom Etne kommune og Vindafjord kommune. Linja er planlagd med store luftspenn over fjord og vatn, gjennom Etnefjella, friluftsområde med høg verdi for regionen og gjennom bustad – og landbruksområde. Slike kraftleidningar har høge master (monstermaster), gir visuell forureining, krev bandlagde areal under leidningane og nye tilkomstvegar både under bygging og deretter for vedlikehald.

Lokalt i Etne kommune er det stor motstand mot denne nye kraftlinja i luft. Etne kommunestyre ønsker difor at Statnett og NVE skal utgreia bruk av sjøkabel og jordkabel. I Vindafjord kommunestyre ønskte eit mindretal det same. Ei frivillig «Teknisk Gruppe», har vist at bruk av sjø- og jordkabel er mogleg.

I Klepp kommune er det ei tilsvarende sak. Der har kommunestyret vedteke å, om naudsynt, gå inn med midlar for å erstatta strekket mellom Tjøtta - Hatteland med jordkabel. Området her har stor verdi for rekreasjon og har historisk verdi. I utgreiinga der vert det vist til at jordkabel minkar energitapet og gir meir stabil drift.

Dette er døme på saker som er kjende nå, og fleire vil koma. Det er naudsynt at krafta kjem fram der ho trengs for å bygga landet, skapa arbeidsplassar, gjennomføra det grøne skiftet og anna. Det må unngåast at dette behovet kjem i konflikt med naturen sine behov.

Årsmøtet i Rogaland SV meiner difor at bygging av jord- og sjøkabel alltid skal utgjera alternativ i samband med bygging av nye kraftleidningar.

Årsmøtet krev konkret at ei slik utgjering må koma for linja mellom Blåfalli – Gismarvik.